

Premier ta nenga propuesta di gremionan

BBO mester wordo introduci 1 di januari 2007

Prome Minister Nelson Orlando Oduber a contesta Sindicatonan den Union y Gremionan Comercial riba propuesta di wanta introduccion di BBO cu 6 luna. Su respuesta tabata uno negativo y a bisa cu BBO lo mester wordo introduci dia 1 di januari 2007.

Den e carta sr. Oduber ta busa cu durante e reunion di dialuna ultimo sindicatonan presente a pidi Gobierno 24 ora pa sinta cu e 8 fiscalista-conseheronan di Gobierno pa discuti e diferencia, etc. E mesun atardi presidente di SDU lo a bel minister di Finanzas pa un reunion cu sr. Ben Marapin di SER, lo cual no tabata e palabracion, segun e carta ta bisa.


Despues, cu diamars SDU a pidi Gobierno pa pa gremionan comercial tambe ta presente den e reunion di diaranson 11:30 am y pa invita SER, RvA y Banco Central, riba cual Gobierno a contesta cu si nan ta desea presencia di institutonan di Gobierno, nan mester mester invitanan, pasobra Gobierno a contradeci nan consejo cu no tabata substancia cu ni cifranan y ni estudionan profundo manera Gobierno si a haci.

Prome Minister a continua bisando cu durante e reunion di diaranson gremionan no tabata interesa pa discuti cifranan y datonan entorno BBO, pero sin mas ta contra su introduccion. Segun sr. Oduber, gremionan no ta na favor di e sistema di impuesto indirecto, manera Gobierno a scohe, pero ta desea algo otro, manera impuesto ariba turistanan, servicionan y tambe manera rapport di SER ta bisa, aumento di accijs ariba gasolin y invoerrechten ariba comestible. Ademas cu Gobierno a bai Curaçao, Sint Maarten y Hulanda pa averigua cual sistema ta mas

adecuado y e escogencia a cai pa BBO.

“Nos lo ta irresponsabel, mirando cu nos mester yega na un presupuesto balansa na 2009, reduci e 46% di debenan di nos GDP te na 40%. Reduci e 11% di nos entradanan cu ta ser paga na interes di e prestamonan te na 6%, teniendo cuenta cu na 2009 nos no ta haya placa mas di Hulanda, mester paga nan 180 milyon florin, y e obligacionnan di Gobierno pa nos infraestructura, educacion, seguridad, salubridad publico y nos gastonan coriente, pa para e proceso di introduci BBO pa 1-1-2007, mirando e parti di debilbe pueblo mester bin na vigor pa dicho fecha”, Prome Minister Oduber a expresa den su carta, puebandu asina di hustifica introduccion di BBO.

Pa e motibo ey e ta urgi gremionan pa substancia nan ponencianan cu cifranan cu a ser haya a base di estudioan profundo haci pa expertonan y no opono sin mas na e escogencia haci pa Gobierno. E ta pidi pa gremionan no stoba un Gobierno democraticamente, legitimamente elegi den un estado di derecho ehecuta su escogencia. “Dia den un estado di derecho esaki no ta posibel mas, nos lo bai biba den un mundo di anarkia y cu leyman di selva cu lo caba cu nos bunita desaroyo economico cu un reparticion husto di su frutonan....Por ultimo e no ta muestra di respet pa cada bes pone un ultimatum pa un Gobierno mientras cu nos tin añanan ta papia caba di cambionan den nos sistema di belasting”, Prome Minister a finaliza.



Normalmente den un pais democratico, e Gobierno cuakiera cu e ta, semper mester tin oido pa su pueblo, y den e caso aki Gabinete Oduber cu ta papiando di un estado di derecho, no ta ateniendo su mes na loke e mes ta predica. Si esey tabata e caso, e ora Gobierno lo a tene cuenta cu e mas di 11 mil persona cu a firma pa para e BBO, lo a tene cuenta cu e rapportnan di tur instancianan cu ta expresa cu e efectonan di un BBO lo ta devastador pa un pais, y esaki ta muestra no di anarkia, pero si di dictadura, y dictadura ta lo contrario di democracia.